

Åtvarar om å lage flaskehals på fv. 615

Gloppen kommune ber Vestland fylkeskommune om å justere eit planlagt utbetringstiltak ved Solheim bru.

Benedikte Grov
benedikte@firdatidend.no

Vestland fylkeskommune planlegg eit arbeid med ny Solheim bru og ei tilhøyrande vegutbetring på fylkesveg 615.

I eit brev til fylkeskommunen gjer Gloppen kommune merksam på at den planlagde breidda på køyrebana vil henge dårleg saman med eksisterande utbetring lenger sørvest på strekninga, og at det vil skape ein flaskehals.

– Blir ein flaskehals

Kommunen opplyser at den nye brua får ei køyrebane på 5,5 meter mellom kvitstripene.

Allereie 125 meter sørvest og 160 meter nordaust for brua smalnar vegen inn til 3,5 meter mellom midtstripene. Kommunen påpeiker at det i sørvest er berre kring 55 meter før vegen blir utvida med inntil 1,2 meter etter ei punktvis utbetring som vart gjort i 2020.

– Resultatet av den planlagde løysinga er at det blir ein flaskehals mellom utbetringa frå 2020 og det pågåande tiltaket ved Solheim bru. Dette blir forsterka av at innsnevringa kjem i eit



Gloppen kommune ber fylkeskommunen justere eit planlagt utbetringstiltak på fylkesveg 615. FOTO: ARKIV

bakketoppområde, samtidig som fartsgrensa aukar frå 60 til 80 km/t, skriv kommunen i brevet.

– Må sjå tiltaka i samanheng

Frå kommunen si side blir det

understreka at tiltaket på fylkesvegen er svært positivt og vil bety mykje for tryggleik og framkome for trafikantane, men ber fylkeskommunen vurdere å sjå dei to tiltaka i samanheng. Konkret oppmodar

kommunen om at den planlagde vegutbetringa blir forlenga slik at ein ikkje får ein flaskehals.

– Ei slik løysing vil både betre trafikkssikkerheita og sikre at dei investeringane som alt er gjort i vegen kjem best mogleg til nytte,

heiter det frå Gloppen kommune.

Vegselskapet Midtvegen AS har tidlegare påpeikt tilsvarende problemstilling overfor Vestland fylkeskommune.